

Shukar, ama o raklo dimi si thagareskoro raklo, na mangela i chhay te ahavel davka, pale lakere manusha da. I phenela:

– Nashti li me te avav te kerav lafi te manushentsa?

– Ma, – phendzhas i Gyulizar – pishim me ka marminav amarentsa i sora ka vakerav tuke so vakerde ola.

Shukar, ahavde pes chuka te ovel. Vakerela i chhay veche pe manushenge i ola da phenena:

– Shun akana, mi chhay, shtom mangesa les, te avel amende te ahavas les save soestar si. Tu vakeresa shukar lafya asal leske – kay si lachho, ahavesa tut lesa, isi tut trin masetse sar stavisalilen, akana amen mangasa te dikhas les. Te si gyorek tuke, ka kandinas, te nanay, ka dikhas.

I oy da, zhala zhi ki len i pale resena pes e raklesa othe. I vakerela leske so phende lakere manusha.

– Amare ka kandinen te prandinav tute, ama pishim mangena te dikhen tut, te ahaven kola si te manusha, ta togava te las amen.

– Me ka zhav man te dikhen, te pendzharen man, ama me manushentsa – phenela o raklo – na mangava te ovel len ozh-besh.

E, ama sar – phenela i chhay – te manushentsa chuka?

– Emi, mange mo dad si babalukos, mi day si leske prandime zomka bresh, ama ov man na mangela man. Man isi man pash leste odayes, pash lende ka beshas, ama nashti te avel mo babalukos tumende te anlashtinel tumarentsa.

– Shukar – phendzhas i chhay, – me ka vakerav amarenge sar si ti buti, ta ka dikhas.

Zhala i chhay, vakerela pe dayake, pe dadeske, ama ola na kandisele:

– A-a-a, nashti! Babalukos li ka ovel, so ka ovel, trebe te aven te dikhas, te zhanas kola si, save si manusha shtom pe khereste ingalela tut. Phuch les te vakerel tuke pe dayako, pe dadesko alav, amen ka phuchas kate si, so si, ka ahavas save manusha si.

I a chhuka, o raklo da vakerdzhas e chhayake pe dadeskoro da, pe dayakoro da alav i e chhayakoro dad veche phuchhela te ahavel kola si leskere manusha. Kalkes phuchhela, kolkes puchhela:

– A-a-a – phendzhas, – tu mi chhay, gelyan li othe, to shoro ka len! Ov si padishaheskoro raklo, sar ka zhas othe? Leskre manusha nanay te den te lel tut! Ame sinyam chore roma!

I chhay na inandisalili, geli pale stavisalili raklesa i phenela leske:

– Amare ahavde kay to dad si o thagar, tu so ka vakeres?